

Codotenteidi **inānite Pabodo nānō cadota ante** **yewæmongainta**

Waa quēwencæminimpa, ante

¹ Wængonguī angā ēñēninque Itota Codito botō imote da godongā gogaīmo inte botō Pabodobo inōmo inte yewæmōmopa. Mōnō tōniñacā Tīmoteo tōnō guēa tedete ate botō, Acæminimpa, ante yewæmōmopa. ² Mōnitō tōniñamīni ēñēdāni. Codota iñōmō quēwēninque Wængonguī quimīni inte mīnitō mōnō Codito nempo quēwēninque ædæmō cæte pōnēmīni iñōmīnite botō iīmaī ante yewæmōmopa. Mōnō Mæmpo Wængonguī tōnō mōnō Awēnē Itota Codito waadete pōnō cæda ænte entawēninque mīnitō gānē pōnēninque watapæ quēwencæminimpa, āmopa.

Nē pōnēnāni beyæ Pabodo Wængonguī ingante apænecā

³ Mōnō Awēnē Itota Codito Wæmpocā iñongante mōnitō mīnitō beyæ ante apænedinque Wængonguī ingante waa ate pōnente apænemōnīpa. ⁴ Edæ, Mīnitō Itota Codito ingante wede pōnēmīni imīnīpa, ante do ēñēmōnīpa. Ayæ, Wængonguī quīnāni inānite tōmānāni inānite mīnitō waadete pōnēmīnīpa, ante mōnitō do ēñēmōnīpa. ⁵ Edæ, Öönædē æidinque mīnitō watapæ quēwenguinque impa, ante edæ Codito do badongampa. Mānōmainō ante, Nāwangā impa, ante watapæ mīni ēñēnō ante mīnitō godōmenque

wede pönēmīni badinque godongāmæ waadete pönēmīni imīnīpa. Īnīnque, Mīnitō mǎnōmaī imīnīpa, ante adinque mōnitō wæætē Wængonguī ingante waa ate pönēnīnque apænemōnīpa.

⁶ Doyedē mīnitō weca ponte apænedinque mōnitō, Mönō Codito ingantedō ante watapæ apænemōni ēñēnīnque mīnitō, Wængonguī nāwangā waadete pönō cæcampa, ante do ēñēmīnitapa. Mǎnōmaīnō ante mīni ēñēnīōnæ incæ mīnitō waincawæ nanguī incawæ baī tæcæ badinque ñowo ganca nanguī apænemīni ēñēnīnque wadāni mīnitō weca nē pönēnāni tæiyænāni badānīpa. Ayæ tæiyænāni badāni baī mönō pönencabo adobaī tōmāmæca tæiyæmō pōni bamōmpa. ⁷ Epapada mōni nē waadedongā incæ, Codito waa pōni nānō pönō cægāinō ante do odōmonte apænecā ēñēmīnitapa. Tōmengā iñōmō Itota Codito beyæ nē cæcā inongā inte mönō imōnite pönēnīnque ædæmō cæcā ingampa. ⁸ Ayæ mōnitō imōnite apænedinque tōmengā, Codotenteidi iñōmō Wængonguī Önowoca nempo quēwēnīnque nē waadete pönēnāni inānīpa, ante do apænecā ēñentamōnīpa.

⁹ Mǎnōmaī beyæ mōnitō, Mīnitō æbānō imīnī, ante tæcæ ēñēnīnque mīnitō beyæ ante Wængonguī ingante apænedinque ñimpo cædāmaī inte cōwē apænemōnīpa. Edæ, Wængonguī æbānō angāā, ante mīnitō ēñente ēwocacæmīnīmpa, ante mōnitō, Wængonguī ēñēmi. Bitō ēñēnō ante apænebi ēñente ēwocadinque Codotenteidi wæætē, Æbānō waa cæte quēwenguī, ante ēñencædānīmpa, ante apænemōnīpa. ¹⁰ Wængonguī apænecā ēñēnīnque mīnitō, Mönō Awēnē tocæcāimpa, ante cædinque

tömengä nänö waa cædö bai mīnitō adobai waa pōni cæcæmīnīmpa, ante apænemōnīpa. Ayæ Wængonguī ingante mīnitō doyedē æmæ ate bai æmæ pōnēnīmīni inte ñōwo wæætē ædæmō ate bai ædæmō pōnencæmīnīmpa. Ayæ waa incawæ bai mīnitō adobai bate cædinque nō mīni waa cæquēnēnonque cæcæmīnīmpa, ante apænemōnīpa. ¹¹ Wængonguī ñāō ēmōnīnque tæ pīñænongä inte pōnō cæcä ate mīnitō edæ tömengä nänö tæi pīñænō bai adobai tæi pīñæmīni ēwocacæmīnīmpa, ante apænemōnīpa. Ayæ, Tömengä mänōmaī pōnō cæcä ænte ēwocamīni inte mīnitō wæntæye badāmaī inte ee cædinque piyænē cæte ee cæcæmīnīmpa, ante ämōnīpa. Ayæ watapæ todirique, ¹² mīnitō mōnō Mæmpo ingante waa ate pōnēnīnque apænecæmīnīmpa, ante mōnitō Wængonguī ingante apænemōnīpa.

Edæ Wængonguī quīmōni imōni bai tömengä mīnitō imīnite pōnō badongä ate mīnitō tömengä quīmīni do bamīnīpa. Inīnque mīnitō tömengä ñāō ēmōmämodē mōnitō tōnō godongāmæ pōñōmīnite tömengä nanguī pōni pōnongä ænīnque mīnitō mōnitō tōnō godongāmæ nē ēamīni incæmīnīmpa. ¹³ Edæ nē wēmō ēnempodongä nempo wæwēñōmonte Wængonguī wæætē mōnō imonte gä pe æmpote ö ænīnque, Botō Wengä botō nē Waadedongä iñōmō nē Awēnē Odeye iñongante mīnitō tömengä nempo quēwencæmīnīmpa, ante māmongä pongamōīmpa. ¹⁴ Tömengä Wengä nämä wepæ petæ petæ wææ beyænque mōnō wænæ wænæ cægainō ante Wængonguī pōnō ñīmpo cæcä ænīnque mōnō abæ tawænte bai quēwēmōmpa.

Codito wængä beyænque Wængongui piyænë cæcampa

15 Mönö adāmaï ingaingä Wængongui æbänö ëmongää, ante adāmaï iñömönte Wængongui Wengä iñömö Mæmpocä bai nē ëmongä inte mönö weca pöningue, Mæmpocä æbänö ëmongää, ante do odömongacäimpa. Wëñëñedë Wængongui nänö badönämaï ingañedë adocä incæ Bamoncadengä bai inongä inte do quëwengacäimpa. 16 İninque Mæmpocä pönö angä ëñëningue tömengä Wengä incæ tömancoo edæ badongacäimpa. Mönö nē adincoo incæ mönö adāmaï incoo awëmö ongoncoo incæ adocä tömancoo badongacäimpa. Awënëidi incæ nē änäni incæ, awënëidi nāni ënempodö incæ nē tæi piñænāni incæ, öönädë owodönāni incæ inguipoga quëwënönāni incæ mänināni edæ tömänāni inänite Mæmpocä pönö angä ëñëningue Wængongui Wengä iñömö badongacäimpa. Badöñongante Wæmpocä, Bitö qui bacäimpa, angä Ao ante badongacäimpa. 17 Adocä Wængongui Wengä incæ Tānocä quëwengaingä ingampa. Tömengä pönö angä beyænque tömengä nänö badongaincoo iñömö adoyömö pönente bai cædinque tömengä nempo godongämæ gongænte cægompa.

18 Ayæ tömengä nē Önoncamö bai nē angä iñongante mönö tömengä ingante mönö godongämæ pönencabo wæætë tömengä tönö adoyonque bai inömö imompa. Adocä tömengä nänö Tæiyæ Awënë baquinque nē badongaingä inongä inte tānocä pönï ingacäimpa. Ayæ æmonga pönï nänö ongonguinque tömengä wænte ate tānocä nē ñāni ömæmongaingä inongä ingampa.

19 Edæ, Botö entawënö incæ botö Wengä tömänö entawencæcäimpa, ante pönö cædinque Mæmpocä iñömö nanguï togacäimpa. 20 Ayæ tömengä Wengä wepæ awäa gowete wædinque wængä beyænque Wængonguï mönö tömämö beyæ pönö cædinque piyænë cægacäimpa. Tömengä Wengä tönö mänömaï pönö cæcä beyænque mönö inguipoga tömäo quëwëmö tönö öönædë tömäo quëwënäni tönö tömengä ingante Ao äninque tömengä tönö godongämæ piyænë cæte quëwëmö adinque Wængonguï iñömö nanguï togacäimpa.

21 Ayæ minitö guiquënë Wængonguï ingante näwæ pämänte gogaïmïni inte wiwa cædimïni inte ocaidë në piïnte bagaïmïni iñömïnite, 22 Wængonguï wæætë, Adocä Codito tömengä baö ëwënente wængä beyænque minitö botö quïmïni badinque botö ayömo tæiyæ waëmö entawencæminïmpa, ante cæcampa. İninque tömengä ñä mënongacä ate minitö tömengä ayongä wentamö mongænämaï imïni adinque, Wënæ wënæ cæbitapa, ante ædö cæte piïnte anguïi. 23 Edæ minitö tæi mænonte bai ongöninque do mïni wede pönënonque ante cöwë godömenque pönëmïni İninque tömengä weca ponte ongömaïmïnipa. Mönitö mönö Codito ingantedö ante mönö pönënö beyæ mönö watapæ bacäimpa, ante apænemöni ëñëmïnitawo. Mänïne ante ñïmpo cædämaï imïni inte minitö tömengä weca cöwë ongömaïmïnipa. Mänïne mïni ëñënïne ante mönitö ñöwo inguipoga tömäo quëwënäni inänite apænemöni ëñënänipa. Mänïne beyænque ante botö Pabodobo në cæbo batabopa.

Mönö pönencabo beyæ botö në cæbo batabopa,

ante

²⁴ Mīnitō beyæ nanguī cædinque nantate wædimo incæte botō nanguī tobopa. Ayæ Codito beyæ ante godōmenque wæquēnēmō inte botō tōmengä tönō guëa baonque nantate wæbopa. Codito mōnō Ōnoncamō bai nē angä iñongante mōnō tōmengä ingante mōnō godongämæ pōnencabo iñōmō tōmengä tönō adoyonque bai imopa. Botō iñōmō edæ mōnō cabo beyænque caate wæbopa. ²⁵ Ayæ, Codito ingante nē pōnēnāni beyæ bitō nē cæbi badinque botō angäine ante adodō adodō ante tōmänō ante edonque pōni apænebi eñencædānimpa, ante Wængonguī angä eñēnīnque botō mīnitō beyæ nē cæquēnēmo do bagaboimpa.

²⁶ Mänīne Wængonguī nänō angäine ante wantæpiyæ wē wodonte bai iñonte mōnō mæmæidi cōwē eñēnāmaī ingadānimpa. Nōwo guiquēnē Wængonguī tōmengä quimō iñōmonte mänīne ante edonque pōni odōmonte apænecä eñēmompa. ²⁷ Iñinque mōnitō imōnite äninque, Waa pōni botō angäine ante mīni waocabo wēēnēñedē mīni eñēnāmaī ingäine ante mīnitō ñōwo tæcæ eñēmīni inte oodeoidi ināmaī ināni inānite odōmonte apænemīni eñencædānimpa, ante Wængonguī cæcampa. Mänōmaī beyæ mänīne ante apænemōni eñēnīnque mīni waa pōni ñāo bai entawengūnque eñencæmīnimpa. Edæ, Mīnitō mōnō Codito ingante ewocadinque mīni ñāo emāmōdē æiyōmīni watapæ bacæimpa, ante mōnō pōnēnō ante mänīneque impa.

²⁸ Mōnō Codito tōmengä nänō eñēnō ante entawēnīnque mōnitō adocä ingante mōnō

Codito ingante ante apænemönipa. Tömengä nempo quëwëninque mīnitō picænāni bai nē ēñēmīni bayōmīnite Wængonguī mīnitō imīnite waa acæcāimpa, ante mōnitō tōmānāni inānite waadete odōmonte apænemönipa. Ayæ, Ēñenguēnē quëwëedāni, ante tōmānāni inānite wææ ante apænemönipa. ²⁹ Mōnō Codito nānō tæi piñænō pōnongā ænte entawëninque botō, Nē ēñēmīni bacæmīnimpa, ante cædinque tæi pæ pagænte cōwë nanguī cæbo imopa.

2

¹ Botō mīnitō beyæ nanguī cædinque Daoditea iñōmō quëwënāni beyæ adobai nanguī cæbo aedāni. Ayæ wadāni botō awinca adāmai ināni beyæ adobai tæi pæ pagænte cædinque nanguī cæbopa, ante apænebo ēñeedāni. ² Botō, Tōmānāni wæwënāmai inte wampo pōnëninque godongāmæ waadete pōnëninque adocabodāni bai bacædānimpa, ante ædæmō cæbopa. Edæ, Mānōmai badinque tōmēnāni Codito nānō ēñēnō ædæmō pōni nāni entawenguinque impa, ante pōnëninque cæbopa. Ayæ, Mānōmai badinque tōmēnāni Wængonguī nānō nē wë wodongaingā ingante Codito ingante edonque acædānimpa, ante botō mānōmai beyæ ante ædæmō pōni odōmonte apænebopa. ³ Edæ, Æbānō i, ante, Æbānō waa cæquīi, ante Wængonguinque nānō nō pōnēnō incæ mōnō Codito mānīnō tōmānō ante ēñëninque waēmō pōni incoo bai wë wodonte mante bai entawengampa. ⁴ Mānōmainō ante apænedinque botō, Mīnitō oda cædāmai incæmīnimpa, ante yewæmonte apænebopa. Edæ wadāni waa pōni

tededäni incæ babæ wapiticæ odömoncæte ante tededäni inäni adinque eñenämaï iedäni, ante wææ ämopa. ⁵ Edæ wayömo quëwëmo incæ mīnitō weca owote bai botō önōwoca pönēmopa. İninqe botō ayömo mīnitō mönō Codito ingante wede pönente tæï piñænte ongöninque iñacabo cædinque töngä pöni cæminipa, ante pönēmopa. Mänömaï iminipa, ante ate bai adinque botō nanguï tobopa.

Codito nempo quëwëninque mīmō quëwëmompā, ante

⁶ Mänömaï beyæ botō iïmaï ämopa. Mīnitō Itota Codito ingante mönō Awënë ingante Ao ante do æmīnitawo. İninqe tömengä ingante do Ao ante ænimini inte mīnitō ñōwo adobaï tömengä ingante cōwë Ao ante tömengä nempo quëwëdäni.

⁷ Mīnitō waomini incæ awæ tæimōwæ ædæmō guiwate pæwæ bai Codito nempo quëwëninque cōwë godömenque picæmini bacæminimpa. Ayæ mönitō odömonte apænemöni mīni eñenö bai cædinque godömenque wede pönëninque tæï piñænte ongödäni. Ayæ Wængonguï ingante waa ate pönëninque watapæ apænedäni.

⁸ Wadäni mä pönente önonquedö ante apænedäni eñente wædinque mīnitō, Mönō imonte ö æncæte ante babæ apænedänipa, äninque wææ cæedäni. Edæ tömënäni dicæ Codito nänö odömonte apænegainö ante apænedäniyaa. Wæætë waodänique nāni odömonte apænegainonque ante Ao äninque tömënäni inguipogaque ante nē pönënäni nāni pönënö bainonque ante cædänipa töö.

⁹ Edæ Wængonguï tömengä nänö entawënoncoo incæ mönō Codito Waocä nē eñagaingä inongä inte

mānincōo tōmancoo entawēninque nāmā baonga ēñacampa. ¹⁰ Öönädē awēnēidi incæ inguipoga awēnēidi incæ nanguī īnāni īñōnāni mōnō Codito adocanque Ñænængä pōni īnongä inte Tæiyæ Awēnē īnongä ingampa. Incæte tōmengä nempo quēwēmīni inte mīnitō tōmengä nānō entawēnō incæ ædæmō entawēmīnīpa. ¹¹ Īninque tōmengä nempo quēwēninque mīnitō wao ōnompoca ēō togæñāmaī īmīni incæte mōnō Codito īñōmō ēō togænte baī cædinque mīnitō baonque ante mīni wīwa cægāinō ante wido cæcä ate mīnitō tæiyæ waēmō entawente quēwēmīnīpa. ¹² Wængonguī nē tæi pīñænongä inte Itota ingante angä ñāni ōmæmongacäimpa, ante wede pōnēmīni inte mīnitō, Itota tōnō godongämæ nāñe wænte baī īmōmpa, ante æpænē guimīnitapa. Ayæ adobaī adocä nē tæi pīñænongä ingante wede pōnēninque mīnitō æpænē guidinque Itota tōnō ñāni ōmæmonte godongämæ tao gongænte quēwēmīnīpa.

¹³ Doyedē ēñēnāmaī cædinque do wænguēnēmīni ingaīmīni inte mīnitō inguipogaque ante mīni cæinēwēnō ante ee mongæñōmīnite Wængonguī angä ate mīnitō Itota tōnō ñāni ōmæmonte quēwengamīnīpa. Edæ wēnæ wēnæ mīni cægāinō ante adinque Wængonguī pōnō ñimpo cæcä quēwēmīnīpa. ¹⁴ Mīnitō pante wæquinque ēñēnāmaī cæmīnīpa, ante Wængonguī wade wade ante wææ angä ēñēninque dodāni adodō adodō ante yewæmōnāni ate wægāmōimpa. Mānōmaī mōnō īmonte ancaa wææ ānāni wæmō adinque Codito īñōmō māñīnecōo mōnō wægāinecōo

ante wëä godonte bai cæcä ate dæ batimpa. Edæ awæ timpodäni wæninque Itota Codito mäninö ante do teëmente mongæ mäo wido cægacäimpa. ¹⁵ Ayæ mäniwäa wæninque adocä tæi emongä inte wënæidi awënëidi tönö në änäni nani wænonguënencacoo gä pe æmpote ö æninque tömengä, Wænoncaincoo nææminipa wænonguiminii, ante bai wadäni ayönänite badete tote bai cægacäimpa.

Öönædë mönö entawënö ante æncæte ante cæedäni, ante

¹⁶ Mönö ee aquënënö incæ bitö quimæ cæmii, Quimæ bebii, ante pönö apænte piinte änänitawo. Wængongui beyæ ante ææmæ cæcæimpa, ante apænte ancæ piinänitawo. Wacä mämö i ate becæimpa, ante wææ änänitawo. Guëmanguïönæ incæ quimæ cæbii, ante minitö iminite apænte pancæ cædänitawo. Edæ æcämenque mänömainö ante apænte ancæ cæyönänite minitö wæætë, Tömänäni nani wææ äninö ante Codito wëä godonte bai cægacäimpa, ante pönëninque guiñente wädämaï incæminimpa. ¹⁷ Cænguï cænte bai bequï bete bai mönö önöwoca beyæ Codito incæ mönö guëmanguimämo bai inongä ingampa. Ìninque Codito ingante ænte entawëninque mönö æbänö cænte bai guëmante bai quëwenguïi, ante odömoncæte ante cædinque dodäni iñömö öwocodenganque odömonte bai cædinque wææ angadänimpa. Mänömaï beyænque tömänäni, Ìimaï cæedäni, Ìimaï beedäni, Ìimaï guëmædäni, ante wææ angadänimpa.

18 Pancadāniya mā pönëninque, Önömonque bai inömö inte mönö anquedoidi inänite waa adinque waa cæcæimpa, ante babæ ante wææ anewënanipa. Ayæ mönitö änö bai cædāmaï ininque edæ mīnitö ænte entawënö ænāmaï inte wæbaïminipa, ante anewëñönāni mīnitö wæætë guñente wædāmaï iedāni. Edæ, Mönitö ate bai do adimöni inte ämöni ëñeedāni, ante tömënāni Codito Önöwoca ingante ewocadāmaï ināni inte mā pönëninque anewënanipa. Edæ, Nāmāneque ante pönëninque tömënāni, Mönitö adomönique waa cæmöni imönipa, ante nāmā waa adānipa.

19 Mönö ocai encamö inte cænguï cæninque mönö baonga wepæmë tömäo gogadinque pæmompā. Ayæ adobai mönö ocai encadinque oguëmë tönö baö beyæ cöñe pö cöñe pö cæmompā. Mönö pönencabo adobai Codito tönö adoyonque bai inñömonte tömengä Önoncamö bai inongä inte në angä ingampa. Mönö mänömaï imö incæte tömënāni wæætë në Önoncamö bai inongä ingante Baa äninque nāmā wido tote wææiñö bai edæ wadæ godānipa. Ininque wææiñö bai ināni incæ mīnitö iminite wææ änāni apa quëwëmīni.

20 Wëenëñedë inguipogaque ante nāni wææ angainö ante në ëñengaimini incæte ñowo wæætë Codito tönö godongämæ wænīmini inte mīnitö wænte bai imini inte mänine ante ædö cæte ëñenguimīni. Inguipogaque quëwëmīni iminipa diyæ mänine ante ëñente cæquënēmīni inguimīni.

21 “Gampodāmaï, Yædæ bedāmaï, Bæi ongönāmaï,” ante tömënāni nāni wææ anewënö ante quīnante ëñente cæmīni. 22 Inæmpā waodānique edæ,

Gampodāmaī, ante nāni ānoncoo iñōmō tæcæ ænte cæyōmīni edæ dobæ wote ba apa eñewēmīni. Inguipogaque quēwēnāni nāni ānewegainō ante eñēninque tōmēnāni wææ ānānipa. Dodāni nāni odōmonte apænegainō ante eñēninque wææ ānānipa. ²³ Tōmēnāni, Ōnōmonque bai inōmō inte mōnō anquedoidi inānite waa adinque waa cæcæimpa, ante wææ ānewēnānipa. Ayæ mā pōnēninque, Cædāmaī, Cædāmaī, ante nāmā baō incæ pānānipa. Īināni ocai encadōnāni inte wææ ānānipa, ante pōnēninque wadāni edæ wæætē oda cædānipa. Īñæmpa, Cædāmaī, Cædāmaī, ante nāni wææ ānewēnō wīi eyepæ i ininque nē eñēnāni inguipogaque nāni cæinēwēnō ante godōmenque wīwa cædānipa, ante āmo eñēmaīmīnipa.

3

¹ Īininque mōnō Codito nē ñāni ōmæmongaingā tōnō nē ñāni ōmæmongaīmīni inte mīnitō æmonga ongoncoo edæ æinente pōnēdāni. Codito ñōwo Mæmpo Wængonguī tōmēmængā inō æi tæ contate ongongampa, ante pōnēninque edæ mīnitō, Æmonga pōni nē quēwengā tōmengā nānō entawēnō bai adobaī entawengæimpa, ante æinente wædinque quēwēdāni. ² Inguipogaque mōnō quēwēmāmo ante edæ wædāmaī inte wæætē æmonga mōnō quēwenguinō ante cōwē pōnente quēwēdāni. ³ Edæ do wænte bai ingaīmīni inte mīnitō ñōwo Codito tōnō Wængonguī nempo awēmō quēwēñōmīnite mīnitō quēwenguinō ante wīi edonque acæimpa. ⁴ Mōnō Codito mīnitō quēwenguinō ante nē pōnongaingā inte ponte a

ongöñongä mänñedē tömengä ñäö entawëninque nänö tæi emömämodē mīnitö adobaï tömengä tönö a ongömini acæimpa.

Inguipogaque ante wægaïmö inte mönö mümö quëwëmö

⁵ Mänömaï impa, ante wædinque mīnitö inguipogaque ante mīni cæinëwënö ante wænonte bai æmæwo wido cæedäni. Nänöogængä inämaï iñongante godö mönämaï ee aedäni. Wiwa mīni pönëwënö ante æmæwo wido cæedäni. Wacä ingante mīni toinente wædö ante æmæwo wido cæedäni. Wiwa mīni cæinëwënö ante æmæwo wido cædinque ee ate quëwëedäni. Mīni mäincooque ante æinëwënö ante æmæwo wido cæte ñimpo cæedäni. Edæ mäincoo ante æinente në wæcä iñömö tömengä, Mäincoo incæ botö wængonguï impa, ante bai wæcä apa cæmīni. ⁶ Në ëñenämaï cædäni inguipogaque nāni cæinëwënonque ante cæyönänite Wængonguï nänö piinguimāmo oo ponguïnö angüënë. ⁷ Mīnitö incæ doyedë inguipogaque ante quëwëninque adobaï mīni cæinëwënonque ante cægaïmīni iminipa. ⁸ Nöwo guiquënë ænguï badāmaï iedäni. Äimīni badāmaï iedäni. Piinte cædāmaï iedäni. Babæ godö wënæ wënæ änewënāmaï iedäni. Wiwa apænedāmaï iedäni. Wæætë, Idæwaa wënæ wënæ cæte awædö, ante mäninö tömänö ñimpo cæte ee aedäni. ⁹ Wëenëñedë mīni entawengaïmāmo ante wido cædinque mänñedë mīni cægaïnö ante adobaï në wido cædimīni inte ñöwo iñömö edæ wacä ingä wacä ingä babæ wapiticæ apænedāmaï iedäni.

10 Wæætē mīimīni edæ quēwencæmīnīmpa, ante Wængonguī do pōnō badongā entawēmīnīpa. Ayæ mānīnō ante nē Badongaingā iñōmō cōwē pōnō odōmonte apæ necā ēñēninque mīnitō mīimīni quēwēmīni inte tōmengā nānō entawēnō baī godōmenque godōmenque adobaī entawēmīni bamīnīpa. 11 Mōnō Codito nempo adoyōmō pōnī inōmō inte mōnō guidiegoidi incæ oodeoidi incæ adomō inōmō imōmpa. Nē ēō togæināni incæ bagādāni incæ adomō inōmō imōmpa. Waodāni incæ cowodēidi incæ adomō inōmō imōmpa. Wacā beyænque nē cæte quēwēnāni incæ abæ tawænte ee gote baī nāmā beyænque nē cæmōni incæ mōnō tōmāmō adomō pōnī inōmō imōmpa. Edæ mōnō tōmāmō Codito adocanque nempo quēwēninque tōmengā adocanque ingante nē ēwocamō imōmpa.

12 Wængonguī, Mīnitō botō quīmīni badinque tæiyæ waēmō bacæmīnīmpa, ante mīnitō imīnite waadete pōnēninque do apænte ængacāīmpa. Īninque tōmengā nānō nē apænte ængāimīni inte mīnitō wadāni inānite waadete pōnente godō waa cæedāni. Nāmā ōnōmoque baī imōpa, ante pōnēedāni. Wadāni inānite ædæmō cæedāni. Æiquedō waa cæquīnāni, ante wædāmaī inte piyænē cæte quēwēedāni. 13 Ayæ wacā nānō cæinēnō ante cæcā adinque mīnitō pīināmaī ee amīni cæcæedāni. Wacā adobaī mīnitō imīnite wīwa cæcā ate wædinque mīnitō godō ñīmpo cæmīni quēwencæcāīmpa. Edæ mōnō imōnte mōnō Awēnē nānō ñīmpo cægāi baī mīnitō adobaī pīināmaī inte godō ñīmpo cæedāni. 14 Ayæ, Adocabomō mōnō baquinque mōnō waadete pōnengæīmpa, ante pōnēninque mīnitō tāno wadāni inānite waadete

pönëninque ayæ tömënäni inänite mïni godömenque cæquënënö ante cæedäni. ¹⁵ Mïnitö adocabomïni badinque piyænë cæte quëwencæmïnimpa, ante Wængonguï mïnitö imïnite aa pegacäimpa cæmïni. Mönö Awënë Codito nänö piyænë cædö pönongä æninque mïnitö piyænë cæte quëwëedäni. Ayæ Wængonguï ingante cöwë waa ate pönente quëwëedäni.

¹⁶ Mönö Codito nänö apænegainö ante ëñëninque mïnitö ædæmö entawëninque nanguï ëñente baedäni. Ìninque nanguï ëñëmïni badinque mïni cabo incæ wacä ingä wacä ingä godongämæ odömonte apæneedäni. Ayæ nanguï ëñëmïni inte mïnitö wacä ingä wacä ingä waadete pönëninque, Ìimai cæcæimpa, ante apæneedäni. Ayæ dodäni Wængonguï ingante waa adinque ämotamïni ante nani yewæmongainta adinque mïnitö wæætë adodö tee empote äedäni. Ayæ Itota Codito nänö cægainö ante pönëninque ämotamïni äedäni. Ayæ adobai Wængonguï Önöwoca pönö apænecä ëñente ëwocadinque mïnitö ämotamïni ante adodö tee empote äedäni. Mänömai ämotamïni äninque Wængonguï ingante cöwë waa ate pönëninque äedäni. ¹⁷ Ayæ æbämenque ante apænemïni incæ æbämenque cæmïni incæ mïnitö, Mönö Awënë Itota ëmöwo beyæ impa, ante tömäa cæedäni. Ayæ tömengä pönö cæcä beyænque mïnitö eyepæ inte Mæmpo Wængonguï weca pöninque tömengä ingante waa ate pönëninque apæneedäni.

Mönö godongämæ quëwencabo ïmai cæte quëwengæimpa

18 Onquiyæmīni eñēedāni. Mōnō Awēnē nempo quēwēnque mōnō eñente cæcæimpa, ante wædinque mīnitō nānōogæñāni inānite Ao ante eñente cæedāni. 19 Onguiñæmīni eñēedāni. Mīnitō nānōogæñāni inānite ædæmō waadete pōnēnque tōmēnāni inānite pūinte cædāmaī iedāni.

20 Wēñæmīni eñēedāni. Mīnitō mæmpoidi inānite ædæmō eñente cæedāni. Edæ mānōmaī cæmīni adinque mōnō Awēnē, Waa pōni cæbi abopa, ancæcæimpa. 21 Wæmpomīni eñēedāni. Mīnitō, Ancaa āmo bai botō wēñængā ænguī badinque guingo imonte wæquēnengā, ante pōnente wædinque wæætē wēñænāni inānite nanguī ānāmaī inte waadete pōnō cæedāni.

22 Wacā nānō nē ō ænīmīni inte tōmengā beyænque nē cæte quēwēmīni iñōmō eñēedāni. Mīnitō imīnite nē ō ængaingā ingante nē cæmīni inte mīnitō tōmengā nānō ā bai tōmāā eñente cæedāni. Edæ, Awēnē Wængonguī incæ botō imote cōwē acampa diyæ, ante guīñente wædinque mīnitō imīnite nē ō ængaingā nānō ayedē incæ tōmengā nānō adāmaī iñedē incæ cōwē eñente cæedāni. Waodānique botō imote waa acædānimpa, ante pōnēnāmaī inte mīnitō nō pōnēnque cōwē eñente cæedāni. 23 Æbāmenque cædinque mīnitō, Wīi waocā beyænque ante cædinque botō Wængonguī Awēnē beyænque ante cæcæboimpa, ante pōnēnque tæi ewocadinque ee cæedāni.

24 Mōnō Awēnē iñōmō tōmengā do nānō angainō bai cædinque mīnitō cægainō beyæ ante eyepæ pōni pōnongā æncæmīnimpa. Mānōmainō ante pōnente cæedāni. Edæ, Mōnō Awēnē Codito ingante adocanque ingante nē cæmīni imīnipa,

ante ämo eñëmaimīnīpa. ²⁵ Nē wēnæ wēnæ cæcä
 guiquēnē tōmēngä nänō wēnæ wēnæ cægainganca
 eyepæ æncæcäimpa. Edæ Wængonguī iñōmō wacä
 ingante wadō wacä ingante wadō ate pōnēnāmaī
 inte tōmāmō imonte apænte äninque pōnō nō pōnī
 paga cæcæcäimpa.

4

¹ Awēnēidi eñēedāni. Mīnitō waocä ingante nē ö
 ænimīni inte eñēedāni ämopa. Edæ mīnitō Awēnēidi
 imīni bai mīnitō imīnite nē Ængaingä incæ adobaī
 mīnitō Awēnē inongä inte öönædē quēwengampa
 cæmīnī. Mīnitō beyænque cæte nē quēwēnāni
 inānite mīnitō nōingä cædinque tōmēnāni nāni
 ænguēnēnō ante adinque eyepæ pædæ godōmīni
 æncædänīpa.

² Wængonguī ingante cōwē apænedinque,
 Tōmēngä æbänō cæcää, ante cōwä adinque
 tōmēngä ingante waa ate pōnēninque apæneedāni.

³ Codito æbänō cæcää, ante dodāni nāni
 eñēnāmaī ingaīne incæ botō mänīne ante do
 eñēnīmo inte apænebo beyænque botō imote
 tee mönedāni wæbopa. Incæte mönitō mänīne
 ante apæneyōmöni mīnitō wæætē mönitō beyæ
 ante Wængonguī ingante apænedinque iīmaī
 ante apæneedāni ämopa. Wængonguī eñēmi.
 Bitō wi ænete bai cæbi ate Pabodoidi nāni
 apænede wadāni mīmōnē guicæimpa, ante
 apæneedāni.

⁴ Codito æbänō cæcää, ante
 botō edonque apænequēnēmo imopa. İninque
 mīnitō botō beyæ ante apænedinque, Pabodo
 edonque apænecæcäimpa, ante Wængonguī
 ingante apæneedāni ämopa. ⁵ Wadāni inānite

bee tēninque mīnitō ocai encamīni inte ēñente cæedāni. Pōnēnāmai ināni do ēñencædānimpa, ante waa apænete cæedāni. ⁶ Ayæ Wængonguī waadete pōnō apænecā ēñēninque mīnitō adobaī wadāni inānite waadete pōnō apænedinque waa pōnī apæneedāni. Wadāni, Æbānō īi, ante ēñencæte ante wæyōnānite mīnitō wæætē nō pōnī ēñēmīni inte nōingā apænemīni ēñencædānimpa.

Waa quēwencæminimpa, ānānipa

⁷ Botō Pabodobo æbānō quēwēmoo, ante nē ēñēningā inte Tiquico ñōwo mīnitō weca pōninque mānīnō ante apænecā ēñencæminimpa. Tōmengā mōnō tōññacā bai īñongante mōnitō tōmengā ingante waa waadete pōnēmōnipa. Tōmengā mōnō Awēnē nempo quēwēninque mōnitō tōnō godongāmæ cæcā īnongā inte mōnō pōnencabo tōmāmō īmonte pōnēninque mōnō beyæ cōwē ædæmō cæcā ingampa. ⁸ Mīnitō, Pabodoidi æbānō quēwēnānīi, ante ēñencæte ante wæmīnitawo. Edæ, Tiquico mānīnō ante apænedinque mīnitō īmīnite ædæmō apænecā ēñēninque mīnitō wampo pōnencæminimpa, ante cædinque botō ñōwo tōmengā ingante mīnitō weca da godōmo pongā aedāni. ⁹ Tiquico goyongā tōmengā tōnō Ōnetīmo mīni cabo nē īnongā īncæ guēa gocæcāimpa. Ōnetīmo cōwē ædæmō cæte nē pōnengā ingampa, ante adinque mōnitō tōmengā ingante waadete pōnēmōnipa. Īninque tōmēna īñōmō, Pabodoidi weca æbānō cædānīi, ante tōmānō ante apænedā ēñencæminimpa.

¹⁰ Botō tōnō guēa tee mōnete ongongā Aditadoco īñōmō tōmengā mīnitō īmīnite, Waa quēwēedāni,

angampa. Ayæ Bedēnabee nānō wænquicā Māadoco adobaī, Waa quēwencæminimpa, angampa. Tōmengā ingante æbānō waa cæquīī, ante do āmo ēñēmīnitapa. Īnque tōmengā pongā adinque waa cæedāni. ¹¹ Ayæ wacā Itota Yoto nāni ānongā adobaī, Waa quēwencæminimpa, angampa. Botō Wængonguī Awēnē Odeye nempo quēwēnāni beyæ cæyōmo oodeoidi incæ wadāni cædāmaī iñōnānite mānīnānique botō tōnō godongāmæ cædinque pōnō ædæmō cædāni ænīnque botō wampo pōnentabopa.

¹² Ayæ mīni cabo inongā inte Epapada iñōmō tōmengā Itota Codito ingante nē cædongā inte adobaī, Waa quēwēedāni, angampa. Tōmengā Wængonguī ingante nanguī apænedinque, Codotenteidi inānite bitō godō cæbi ate tōmēnāni picænāni baī bacædānimpa. Ayæ bitō angainō tōmānō ante ēñente cædāni inte tōmēnāni tæī piñænte ēwocacædānimpa, ante tōmengā mīnitō beyæ ante cōwē apænecampa. ¹³ Mīnitō beyæ tōmengā nanguī cæcampa. Daoditea iñōmō nāni pōnencabo beyæ adobaī Yedapodi iñōmō nāni pōnencabo beyæ adobaī tōmengā nanguī cæcampa, ante botō nāwangā apænebo ēñēedāni. ¹⁴ Ayæ, Waa bacædānimpa, ante mōnō nē cædongā tōmengā emōwo Odoca tōmengā iñōmō mōnō nē waadecā ingampa. Tōmengā tōnō Deēma, Waa quēwencæminimpa, ante adobaī ānapa. ¹⁵ Ayæ botō Pabodobo beyæ ante wæætē Daoditea iñōmō mōnō tōniñadāni inānite mīnitō, Waa quēwēedāni, æedāni. Diimpa inante, Waa quēwēedā, æedāni. Ayæ Codito ingante nāni pōnencabo tōmēnā oncōnē godongāmæ ponte apæneyōnānite mīnitō

wæætē botō beyæ apænedinque, Pabodo, Waa quēwēedāni, angampa, æedāni.

¹⁶ Ayæ iinta botō cadota ante yewæmōinta iinque adinque mīnitō, Daoditea iñōmō Codito ingante nāni godongāmæ pōnencabo adobaī acædānimpa, ante cædinque da godōmīni ænte acædānimpa. Ayæ daoditeaidi iñānite botō cadota ante yewæmōninta adobaī āmīni da pōnōnāni æninque aedāni.

¹⁷ Ayæ Adoquipo ingante apænedinque, Bitō mōnō Awēnē pōnō angā ēñēnīmi inte bitō cæquēnēnō ante tōmāā ædæmō cæe, æedāni. ¹⁸ Botō Pabodobo tōmēmo ōnompoca yewæmōninque, Waa quēwēedāni, ante tōmēmo ēmōwo ante yewæmōmopa. Botō æbānō yæguincamē encapote wæboī, ante pōnēninque mīnitō Wængonguī ingante apæneedāni āmopa. Wængonguī waadete nānō pōnō cædō ænte entawencæmīnimpa, ante māninque ante yewæmōmopa.

Wængonguï nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

9bedab5a-39ff-5163-a35b-8056cbbe8690